

欽定剿平三省邪匪方略

欽定剿平三省邪匪方略續編卷三

癸亥年

正月十六日

壬午

德楞泰奏言竊

臣

督兵移向東

南截剿零匪據夔州協副將富明阿等稟報十

二月十三日夜有總兵馬瑜派出之都司史定

川等追賊一百數十人在奉節之小曲山乘夜

襲擊出其不意殺死賊匪四十餘名生擒三十

餘名屋內燒死賊屍七十餘軀只剩二十餘人

帶傷竄入老林等語當飭史定川等嚴密搜捕

臣行抵太平之貓兒壩先後接准額勒登保來

信以扎克塔爾穆克登布所剿之賊二百餘人

尙在巴山老林黑洞溝一帶藏匿官兵因林密

雪深尙未集事又聞陝境南山零匪二百餘人

被剿亦欲竄過南岸額勒登保現仍暫駐西鄉

界內以爲南北兩路策應令臣併力先將巴山

林內藏匿之賊並江北南山敗匪一併就近掃

除再爲東向等因查

臣

督兵東行原恐色爾滾

馬瑜等所追之賊由太平連界東奔入楚是以

移師太平東鄉遏其東竄連日據各處探報色

爾滾馬瑜剿辦之賊已截向梁山奔逃該處有

叅將桂涵遊擊羅思舉陳弼等三路兵勇併力

兜剿是此起等匪不但距楚愈遠而兵力壯盛

當亦易於集事

臣

遂於初三日督兵由貓兒壩

折回初四日趕抵西鄉之漁渡壩直趨巴山探

明賊蹤與扎克塔爾穆克登布等併力設法圍

剿並探江北之賊如果南竄又可環攻掃除以

冀根株淨絕一律廓清上紓

聖廑奏入

上命軍機大臣傳諭額勒登保德楞泰曰此次都司

史定川等在奉節之小曲山地方乘夜襲擊零匪
殲斃四十餘名生擒三十餘名又燒斃七十餘名
所剩殘匪無多俱竄入老林諒不難剿除淨盡至
現在色爾滾馬瑜等剿辦之賊已截向梁山該處
有桂涵羅思舉陳弼等三路兜剿易於集事其川
楚邊界零匪有豐紳等各路官兵搜捕嚴密此時
局面自應以先清陝境爲要德楞泰因接額勒登

保來信以南山餘匪欲奔南岸督兵仍赴陝界協力設法攻剿此起零匪竟當聽其竄往南岸合各路兵力環攻掃除惟該匪等南竄之後必當飭令將領在江北一帶嚴行防範不可再令賊匪折回致辦理又形費手至川東一帶卽責成勒保上緊趕辦迅就肅清勿留遺孽此時大功早經告厥中外咸知卽搜捕零匪一節亦所共悉僉稱指日卽

可蕩平若稍有遲延轉致人心猜疑成何事體額
勒登保等受朕恩眷務當倍加奮勉併力剿捕期
於正月內二月初將三省餘孽悉數殄平方副委
任

同日吳熊光奏言竊臣前飭屬將崔宗和擒獲

後復向崔宗和訊明胡明遠年貌密飭嚴拏茲
據候補知州竹山縣知縣范繼昌委員候補縣

丞張從鼎稟稱該員等訪得平安寨寨民收有
自賊夥逃出之胡大貴一名形跡可疑當卽赴
寨查訊據該犯初供名胡大貴係爲賊裏逃出
投寨傭趁後查看該犯臂膊手指俱經帶傷與
崔宗和所供胡明遠受傷之處相同復向追問
言詞炯爍當將該犯拏獲始據供出胡明遠本
名並供認歷年同崔宗和到處竄擾及抗拒官

兵各實情不諱臣現在飛提該犯前來房縣親

加驗訊並查調認識該犯之眼目質訊明確再

行具

奏其獲犯之印委各員亦俟訊明分別請

旨至各路搜捕情形二竹房縣境內已據報並無賊

匪惟巴歸一路尙有數十零匪經吉林泰派兵

在筭箕坳殲獲十七名所餘無幾臣復飭李天

林帶兵前往協捕嗣據該鎮稟知業奉叅贊德
楞泰飭令移兵川楚交界防剿該鎮率兵至茅
山嶺曾家嶺等處扼截適探有零匪一百數十
人由馬家村竄至蔡家山該鎮派叅將楊安都
司張大勲前往剿捕沿途殲獲數名詎該匪被
追情急散匿朱家壩兩旁林內都司張大勲在
前督兵進發該匪陡然衝出都司張大勲外委

稅印太率兵奮力格殺斃賊數名猝中矛石被
害兵勇亦間有傷亡該匪乘勢逃回萬古寺前
金堽一帶吉林泰復派叅將毛秉剛都司張代
鳳帶兵跟蹤前進又據督辦興山團寨之同知
張許暨該縣文武稟報排搜至青天泡魚兒溝
等處遇有零匪數十名擊斃三名帶傷逃遁者
十餘名又擊斃匪四名等情臣伏查該同知

等所稟截擊零匪是否卽吉林泰追捕之賊抑
係另夥竄匪現復分差確探至興巴一路臣已

查照額勒登保德楞泰前次酌定章程令李天
林將所帶兵勇敢道興山前赴歸巴協同吉林
泰剿捕不特興山境內零匪足資搜剿卽現由
萬流竄至黃金堽三百餘賊匪亦可協力圍捕
至該匪被剿北竄卽係房竹邊界臣飛飭慶溥

與副將呢瑪善由北向南探剿俾資聯絡現在
川東剿散零匪難保其不逸入楚境以目下情
形而論無論在川在楚總應專力於剿已嚴飭
該鎮等務期剷絕根株不得稍有鬆懈奏入

上命軍機大臣傳諭吳熊光曰此次竹山縣知縣范
繼昌縣丞張從鼎將自賊夥逃出之首逆胡明遠
一犯在平安寨地方盤獲尙屬能事但據該督稱

查核該犯所供投入賊營及什居籍貫與歷次獲犯供詞尙不甚符合或係該犯希圖狡展亦未可定自應詳細訊究著吳熊光卽將該犯提到房縣親加查驗如實非胡明遠則已若果係胡明遠於訊明辦理後卽據實奏聞所有范繼昌張從鼎二員俟吳熊光覆奏到日再降恩旨至歸巴一路探有零匪三四百人在彼奔竄係色爾滾馬瑜等追

剿之賊本日據德楞泰奏此股已經竄至梁山距
楚已遠現有勒保督率桂涌等剿辦自能迅就掃
除該督惟當於房竹邊界一帶嚴飭慶溥呢瑪善
等實力防範認真探剿爲要

十七日癸未額勒登保奏言連日據報扎克塔爾

穆克登布督率兵勇由倒水硎菩提河跟追賊
匪沿途陸續擒獲三四名五六名不等查探賊

蹤忽分忽合條東條西並無定向必須設法誘
剿遂一面傳令兵勇暫爲駐紮一面仍派安弁
密探賊蹤詎該匪知我兵尙未緊追亦於相距
九十餘里之陳家溝林內散處計圖掠食穆克
登布卽挑派兵勇令遊擊劉元明都司李廷珍
守備馬忠良千總顧應全等帶領分路前往乘
夜圍剿匪衆猝不及防當斃賊匪十餘名生擒

八名天明時分投搜捕又斃賊匪九名生擒十
三名該匪向柳林溪黃連壩南竄穆克登布仍
跟蹤而進又據楊遇春呈報連日向西探剿據
報深洞子有賊匪百餘人伏匿隨派兵搜捕斃
賊五名生擒八名餘匪奔竄大小壩翻山潛遁
現與副都統銜噶拉泰將祝廷彪等分路進剿
達勒精阿武隆阿帶兵在南江陳家壩一帶探

剿相距不遠已知會迎頭夾擊各等情查該匪等疊經剿殺或百餘人或數十人分逃

臣

現飭

楊遇春穆克登布將所帶官兵均勻揀配每數百人爲一路分爲數隊自北向南深入老林櫛比排搜遇賊卽剿或將該匪轟出老林逼其深入通江境內可與川中各路官兵合力夾擊一鼓剿洗現據節次獲犯供稱有各思逃散之語

雖未足爲憑信但刻下官兵雲集各該匪自知
萬無生理思欲解散潛藏亦屬情理所有正可
乘機辦理欽奉

諭旨會同德楞泰出簡明告示諭以此時果能悔罪
逃出赴營卡寨堡投首仍當妥爲安插或私自
各回原籍仍理舊業地方鄰里亦斷不以曾經
從賊訐告治罪刊刻多張分給各前敵官兵與

營卡寨堡於深山僻逕遍爲粘貼並行知川陝
被賊地方一體查照辦理以換賊黨而廣

皇仁至南山零匪據楊芳稟報有賊匪百餘人竄至
玉笋溝官兵乘夜掩殺殲斃十餘名生擒二十
餘名該匪折奔東北向鎮安孝義竄去其南山
西老君嶺一帶尙有零匪百十八有李應貴副
將吳廷剛各帶兵勇分路趕剿尙未據報斬獲

情形

臣

俟數日內此間餘匪辦竣仍令楊遇春

前往督率趕辦再接吳熊光來信陝楚邊界二

竹境內各官兵搜緝並無賊匪藏匿又接寶冲

阿報稱陝省平利安康紫陽及沿邊山林內逐

處查搜亦無藏匿零匪實屬寧謐

臣

現將各路

征防鄉勇陸續裁撤趕辦善後事宜奏入

上命軍機大臣傳諭額勒登保曰此次扎克塔爾穆

克登布楊遇春搜剿川陝邊界零匪多有斬獲其
平利安康一帶亦無藏匿零匪看來賊匪所剩無
幾指日即可肅清額勒登保因賊勢窮蹙會同德
楞素出簡明告示遍爲解散應再明白宣諭以爾
等欲自行散夥希冀逃生何不趁此投出以全身
命況爾等俱不過脅從夥匪並非稔惡貫盈者可
比如果棄械投誠無不概予生全且當此大功告

歲凡軍營出力人員擒獲積惡首犯多名俱已仰
蒙恩賞豈尙誘爾等投出欲以擒獲邀功爾等當
亟思悔悟詣營投首必當奏明收撫毋得心生觀
望自蹈滅亡如此愷切曉諭庶匪徒等聞風解散
於搜捕更爲有益但不可因此一意招撫少爲鬆
勁仍當上緊督兵逐處排搜使賊匪無路潛逃掃
除淨盡於迅速之中切勿草率從事爲要額勒登

保將各處零匪上緊辦完後三省實在肅清卽遵
昨旨用六百里奏報三省餘匪一律肅清並卽令
德楞泰先行起身進京額勒登保在彼與該督等
籌辦地方善後事宜所有各路兵丁不可遽行裁
撤應酌量情形陸續遣回俾沿途驛站亦可從容
應付至全數撤兵必須俟德楞泰回任額勒登保
來京方可盡行撤令歸伍也

二十五日

辛卯

額勒登保德楞泰奏言竊

臣

額勒

登保督兵由大寧巴山取道羅家壩仍折向鎮

子山一帶緊顧陝疆探剿

臣

德楞泰派令副都

統富僧德總兵滿尚佐帶領官兵由簡池壩廟

廟向西探剿

臣

德楞泰帶兵由漁渡壩取道拴

馬嶺向北進發以期迎剿北來竄匪十四日行

次峽口場與

臣

額勒登保彼此會晤據楊遇春

呈報連日賊匪又向小岔溝老林奔竄督率叅將祝廷彪等分兵三路行抵賊屯向前剿殺立斃賊匪九名生擒六名餘匪驚起四散我兵分投趕殺又斃賊十六名生擒十八名除滾巖跌斃外僅留二十餘名鑽林逃散又據穆克登布呈報連日分派將領帶兵由天明寺佛頭山一帶隨處排搜未見成股賊匪蹤跡惟於壩溪老

林內探有零匪十數名一見我兵卽行分遁內
有賊六名經兵勇用鎗箭擊斃現仍遍歷搜捕
據富僧德蒲尙佐報稱連日帶兵由馬家壩一
帶進發探有零匪數十人由白石板河竄去隨
督兵由紅椿溝向平河子截剿途次盤獲賊匪
陳學彭作太二名兵至光頭山鎗斃賊匪五人
生擒賊匪二人餘匪驚懼四竄官兵分投趕剿

又殲斃十六名該匪均三五零星飛竄並據各寨洞民人於山林內搜獲逃散零匪或一二名

或三四名陸續解赴臣等軍營審訊臣等將搜

獲之寨民賞以銀牌面爲曉諭令隨地搜查以

清餘孽又據成都府知府趙秉淵稟報正月初

三日經達縣委員教諭倪朝縉督同軍功李元

德王丕承等先後招出賊匪賴應舉王勳魏文

禮等全夥二十九名現在分別安插再南山東
面零匪折竄鎮安孝義境內經總兵楊芳抄赴
東北截剿該匪復西竄寧陝奔入秦嶺老林楊
芳鼓勵兵勇兼程抄截該匪日夜亡命狂奔十
四日三更竄至西鄉屬之七星壩約有二百餘
人乘夜躡渡向東南奔竄臣等聞報之下卽挑
派馬步兵勇六百餘名令副都統銜富登阿副

將王兆夢遊擊楊森帶領星馳由馬家灣前往
趕剿一面飛飭各營卡截擊一面飛札楊遇春
且不必入南山速卽帶兵由私渡河取道西鄉
專辦此股以冀卽日掃盡

額勒登保德楞泰又奏言竊查厯年隨征打仗
兵勇內陣亡病故受傷者先後經臣等隨摺聲

敘查明造冊咨送查辦議卹在案茲准兵部咨

覆除員弁兵勇陣亡病故受傷者均已查明題
赴照例議卹外惟無開陣亡民壯劉萬清等八
十六名張珍等五名軍營列功後病故民壯胡
學賢等二十一名番隊等二名受傷民壯邱瑞
祥等一百四十名劉貴等二十一名俱無議卹
之條應令該將軍及經畧大臣自行給賞等因
前來伏查民壯一項與鄉勇名目雖殊而打仗

殺賊則與鄉勇無異並有散遣回籍之民壯後
仍應募充當鄉勇者與現在隨征新勇撤遣回
籍後仍在本寨作爲團勇者事同一體是民壯
鄉勇團勇三項名雖不同實則皆民間壯勇爲
國出力茲准部咨以民壯一項部內並無議卹之
條行令_臣等自行給賞在部中照例查辦固爲
慎重

恩卹起見然民壯之殺賊衝鋒陣亡受傷病故均屬
勤勞

王事以應與鄉勇等一律查辦部議令

臣

等自行給

賞未經明奉

卹恩似不足以慰忠魂而昭獎勵亦非仰體

皇上軫卹戎行至意可否將陣亡受傷及列功後病

故各民壯照鄉勇議卹之例一體給與卹賞出

自

天恩伏候

聖裁均奏入

上命軍機大臣傳諭額勒登保德楞泰曰此次額勒
登保德楞泰等督率將弁於川陝界聯地方及川
東一帶分投搜剿斬獲零匪三百餘人又招出領
應舉等二十九名分別安插所辦尙好前此節據

摺內奏報川陝邊境剿殘餘匪約計六七百人除
現在殲擒外爲數祇餘一半卽合之南山老林竄
過漢江之賊二百餘名亦不過數百人無難迅卽
掃除前曾降旨限令儘此正月務當辦竣今將屆
月杪又未能如期歲事額勒登保等惟當上緊趕
辦固不可稍有草率亦不得再有遲延並當出示
曉諭量爲招撫以現在逆犯中稍稍著名者惟齊

綱典宋應伏雖尙未伏誅但亦非積年首惡如果
自行投出尙當貸其一死並曉諭從賊夥黨此時
賊勢業經官兵痛剿殘敗已極爾等何苦相從奔
竄身罹誅戮卽如賊目張長青王國賢及現投出
之賴應舉等均已奏明蒙恩曲赦何況爾等俱係
脅從若棄械投首無不概予生全其中有齊國典
宋應伏熟識者若能勸令來投必當同該二犯一

體免其死罪否則有能將此二人設法擒獻不但
赦罪抑且可邀恩賞爾等勿心生觀望自取滅亡
如此剴切詳諭亦解散餘匪迅速肅事之一法額
勒登保等仍當一面嚴飭將領上緊排搜力求完
善於三省廓清後卽遵照前旨用六百里奏報俾
衆共知零匪辦竣同深欣慶

同日

上諭內閣曰額勒登保等奏陣亡病故受傷民壯懇
請照鄉勇例議卹向來民壯陣亡傷故例無議卹
專條但念該民壯等俱係挑派隨營殺賊衝鋒勤
勞王事與鄉勇團勇等原無區別所有軍營陣亡
受傷及列功後病故各民壯俱著加恩照鄉勇議
卹之例一體咨部給與卹賞以昭激勵

同日惠齡奏言竊臣據東路探報前次竄入黑

山之賊又由老林竄入長灣地方楊芳聞信連
夜由八里坡抄進於次日申刻趕抵賊屯直前
掩殺立斃賊十六名餘匪由東面折回由裏巢

一帶西竄

臣

當卽帶兵由柴家關探蹤迎剿楊

芳亦由柴家關兜截前來

臣

率同緊趕至松花

坪趕上賊匪兵勇鎗箭齊施立斃十餘人生擒
僞先鋒張芝芳矛手黎升等五名把總袁華俊

軍功伍敏用箭攢射將穿紅衣賊目登時射斃
餘賊始紛紛潰逃訊據獲賊張芝芳等供稱我
們打散零匪共有二百餘人剛纔射死那穿紅
的是元帥嚴思讓等語當將該犯等分別凌遲
梟示仍督飭兵勇乘夜進襲追至板房溝把總
蒲子琴張文魁等奮力衝撲截斃賊匪十餘人
生擒一名臨陣投出靳士瀚等十一名滾崖跌

斃帶傷者甚多又守備吳順帶兵截殺斃賊數
名該匪等先後由洵陽壩向東南狂奔至李應
貴所追西路之賊連據稟報在嶺北陽峪內之
水梯子一帶地方併力掩殺殲斃賊匪二十一
名生擒黃大支等十一名餘匪向一碗泉洪窰
子等處逃匿李應貴追至分水嶺復搜出零匪
十餘人兵勇趕上截斃三人其餘均滾跌傷斃

又據通判維昂稟報督率軍功陳廷標等截殺
殲斃賊匪九人生擒七名叅將李應元委員雷
燦稟報領兵勇趕殺三名此股零匪經數路兵
勇兜逼亦有竄過棧西之勢臣飛飭李應貴等
總須顧住東北老林向南逼剿務期及早肅清
仰慰

聖鑒奏入

上命軍機大臣傳諭惠齡曰此次遁入長灣一帶並
水梯子等處零匪經惠齡督率總兵楊芳李應貴
並各路兵勇分投兜剿擒戮賊匪一百餘人並殲
斃賊首嚴思讓等所辦尙好惟該匪等被剿緊急
仍由秦嶺老林向東狂奔近逼漢江南岸本日已
據額勒登保等奏報此起賊匪二百餘人業經躡
淺偷渡南岸額勒登保現已派令鎮將截擊並飛

調楊遇春取道西鄉向東專剿是惠齡所辦一路
賊匪更屬無幾易於搜捕淨盡至西路一股餘匪
經數路兵勇兜逼有竄過棧西之勢惠齡飛飭李
應貴等顧住東北老林向東逼剿該匪等如果竄
往棧西亦可無慮該處有興奎並防守甘境之朱
爾漢等各路兵勇正可與李應貴兩面夾攻不難
就地殲除斷不可再令折回老林致搜捕又須費

手

二十七日癸巳勒保奏言竊臣前派叅將羅思舉

分兵由渠縣向廣安岳池定遠合州一路派叅

將桂涵都司周士貴分兵由達縣向大竹隣水

江北長壽墊江一路又派遊擊陳弼分兵由新

寧向梁山萬縣忠州一路以次排搜臣移營自

西向東督辦茲據羅思舉稟稱該叅將帶兵由

渠縣至合州隨地麗探所過山林內均無賊匪
蹤跡又據桂涵稟稱搜至江北麗屬月來場探
有零匪四十餘人在彼竄走當率兵跟追五十
餘里殺斃九名生擒二十六名解送來營又據
周士貴稟稱搜至墊江縣所屬涼風埡探有零
匪三百餘人在彼潛匿卽率兵搜獲男婦三十
二名口內有賊匪二名抗拒常經官兵殺斃其

餘解送來營又據陳弼稟報搜至梁山所屬羅
都寨探有零匪八九十人當卽帶兵往捕殺賊
十一名生擒六名現仍緊躡追捕又據署雲陽
縣知縣梁敦懷稟稱王國賢殘匪一股會合藍
號餘匪共三百餘人連日被兵追剿王國賢乘
隙逃出自赴雲陽投首等情臣查王國賢一犯
尙非緊要首逆今旣悔罪逃出自當准其投首

其應如何安置之處俟提到審明後再行核奏
其餘夥黨既未同投仍應剿淨當卽飭催副都
統色爾滾總兵馬瑜趕緊辦理茲據報稱在金
竹園望梨垵等處趕上賊尾殺斃十六名生擒
十九名又在金風嶺崖屋子一帶殺賊十九名
生擒二十三名俱經馬瑜訊明分別辦理至此
股剿剩餘匪沿途紛紛逃散者甚多所餘不及

二百人色爾滾馬瑜現仍趕緊剿辦又總兵張
績等在巫山大寧邊界搜剿有楚境零匪一起
竄近開口張績派兵迎剿擒獲活賊三十一名
解交巫山縣訊明分別辦理又據辦理團練之
教諭倪朝縉稟報有青號賊目賴應舉王勳譚
禮等三人赴寨投首訊係青號張泳壽股內之
賊共有三四十人在老林藏匿近聞川省有投

出免死告示是以前來探信等語倪朝綱當卽
宣布

恩旨面加開導賴應舉卽將山內藏匿之同夥二十

九人全行招出經臣提案訊明卽照張長青之

例分遞各原籍安插又據大寧縣稟稱近日該

境桐油壩飛仙觀一帶有零匪百餘人臣現在

知照豐紳派兵剿辦臣查川省東路現在渠縣

廣安岳池定遠大竹隣水墊江江北等處均已
肅清其忠梁開萬一帶山內間有零星餘匪亦
已無多現在分兵排搜卽日可期淨盡臣俟將
忠梁開萬等處以次搜淨卽督率官兵將沿邊
老山排搜統計儘此二月內可以全清至川北
通南廣等處現在均無賊匪蹤跡

同日吳熊光奏言竊總兵吉林泰一路截擊自

川竄楚零匪該匪由萬流繞竄入境向黃金埡
一帶逃遁有東趨之勢查黃金埡東南爲歸州
屬之新灘口岸正東爲東湖屬之焦贊埡等處
該二處均有地方委員帶勇扼截該匪折向西
北經吉林泰派出叅將毛秉剛都司張代鳳帶
兵抄擊斃賊五名生擒十四名賊匪踞險擲石
又因雪後山路疑滑站脚不住把總羅萬泰外

委趙光前猝被石傷身亡馬步兵勇亦損傷數
名該匪亦乘間北竄與山保康接壤之段江地
方經團勇縣丞詹英豪迎截傷斃賊匪數名賊
卽折向南竄時值總兵李天林吉林泰均帶兵
趕至兩相知會分投衝擊將該匪截爲兩起一
起數十人遁入東湖屬霧渡河老林吉林泰跟
蹤追捕一起百餘人有向西南南陽河折回川

境之勢李天林趕赴龔家橋要監攔截仍令副將孫應奉等追剿前進查此起零匪探係青黃兩號剿剩餘黨旬餘以來輾轉竄逃未能立就廓清實深憤恨

臣

已嚴飭吉林泰李天林等無

論在楚在川均當立時撲滅不得意存畛域再前據竹山縣知縣范繼昌委員張從鼎稟獲賊犯胡大貴訊據供認卽係首逆胡明遠

臣

親提

審訊該犯亦直認胡明遠不諱及傳到前被胡
明遠裏入賊營投出之保康縣民人方有認識
據稱並非胡逆正身乃係胡明遠營內管事先
鋒黃秉祿加以質對始據供出本名黃秉祿係
四川雲陽人向隨胡明遠一路充當先鋒歷年
抗拒官兵逃出後恐人識其姓名是以改名胡
大貴復詰其因何冒認胡明遠據供既被盤獲

料無生理不如認作胡明遠庶兵役寨勇皆知
胡明遠已獲不致到處緝拏俾胡明遠得以潛
身遠遁等語似此黨惡狡展實爲胡逆切近之
人必深悉胡明遠下落因向其反復究問該犯
仍茹刑不吐可惡已極臣現在委員設法熬訊
務得胡明遠實在蹤跡遴員密拏一面將該犯

黃秉祿正法

吳熊光又奏言竊臣欽奉

諭旨籌辦安插鄉勇一事伏思馭勇之道全在寬嚴

並用使之知感知畏臣初到豫省時鄧州鄉勇

亦未免滋事經臣

奏明裁勇添兵嗣因江防綿亘兵力不敷復責成

地方官擇其來歷明白者始准招充不准首事

人等私行招募是以上年易於散撤楚省鄉勇

從前亦係各州縣就近募雇四年以後因川陝
征兵來楚隨帶各鄉勇其中有自留楚省者當
時帶兵之員取其能探聽賊信掩襲賊蹤遂爾
留營隨剿嗣又有因川陝不得鹽糧來楚覓食
不得不暫爲羈縻者前經附摺奏明在案目下
本省鄉勇如籍隸施南房竹之人已陸續裁撤
分散復業尙無桀驁滋事之患惟川陝鄉勇之

在楚者川勇尤居大半此等原係無業游民傭
趁爲生若僅給予盤費貲送回籍每每中途逃
回徒費無益若非示以懲勸使其有所忌憚一
經裁撤難冀盡能守法今蒙

聖明訓示除遵

旨再出示剴切曉諭外更當隨時稽察有犯必懲俾
知儆懼并於大兵未撤以前酌量籌遣知照各

原籍地方官妥爲管束免致結隊擾民至從前
所撤本省鄉勇及陝省遞回各勇現在俱屬安
靜此後尙有陸續裁撤者臣仍當督飭各屬妥
爲安置如有不知守分謀生之人更當隨時查
究按律嚴辦以冀潛消桀驁勉爲善良用副
聖明綏輯地方至意均奏入

上命軍機大臣傳諭勒保曰此次總兵張績叅將桂

涵遊擊陳弼都司周士貴等在川東各州縣分授
搜捕零匪多有斬獲現在渠縣廣安岳池定遠合
州大竹隣水墊江江北等處均已搜捕肅清惟據
稱雲陽地方有王國賢殘匪合藍號餘匪共有三
百餘人節經色爾滾馬瑜等督率官兵在金竹園
金風嶺一帶殲擒數十名沿途逃散者甚多此時
所剩不及二百人色爾滾等現仍趕緊剿辦此起

殘匪既係王國賢餘黨王國賢業已投出何不卽令其招徠同夥卽使去而不返或竟被匪黨殺害亦無關輕重勒保俟提到王國賢審明後應卽解送色爾滾軍營令王國賢招諭夥匪告以我本係頭目現今悔罪投出蒙恩免死並得妥爲安置卽屬良民爾等何不趁此散夥棄械來投必能同邀恩宥如此明白宣示該夥匪等見伊頭目自行招

集必當踴躍出投不生觀望庶賊黨中多投出一人即可多活一命仍一面上緊排搜更可期迅速完竣至所稱大寧縣地方有散匪百餘人本日據吳熊光奏吉林泰一路迎擊自川竄楚零匪將該匪截爲兩起一起百餘人向西南狂奔有折回川境之勢此起散匪或卽係吉林泰所辦之賊因截剿緊急分出百餘人仍折入大寧境內亦未可定

如竟係自楚折回勒保應查明由何人管轄地方
竄入據實叅奏並當飛咨豐紳迅卽派兵剿辦將
境內殘匪一律殄除淨盡爲要其青號賊目賴應
舉王勲譚禮等帶領二十九人全行投出勒保照
張長青之例分遞原籍安插所辦甚是但應飭令
地方官分散安置隨時稽查毋任其聚集一處或
致再生事端至勒保統計儘此二月內可以全清

一語尙屬含混此時川東業已無賊其忠梁開萬
山內雖間有零匪亦已無多卽王國賢一起殘匪
亦無難剿撫兼施剋期辦淨勒保總應上緊搜捕
務於前二月內將川境所有餘匪全數廓清毋得
稍有延緩

上又命軍機大臣傳諭吳熊光曰此次青黃兩號剿
剩餘黨由萬流輟轉奔竄經吉林泰李天林等率

領兵勇進抵興山分投衝擊將該匪截爲兩起一起數十人遁入東湖屬霧渡河老林一起百餘人有向南陽河折回川境之勢楚省零匪早已肅清前經降旨嚴密防堵邊界不得再任竄入今興巴一路又有自川竄來之賊據稱由萬流繞竄入境該處會否派有防堵之員亦應查明叅辦不可因軍務大局已竣稍爲姑息至該匪人數無多亟當

排搜淨盡本日據勒保奏稱大寧桐油壩一帶有散匪百餘人或係由楚境老山竄來等語此起彼零匪想卽吳熊光摺內所稱向南陽河折竄回川剿散餘黨百餘人亦未可定現經李天林與副將孫應奉等前往攔截該督惟當嚴飭各鎮將等緊躡賊蹤勿令竄出之賊再行闖入如相距不遠并當不分畛域併力搜除以期一律廓清至東湖竄匪

應卽飭令吉林泰上緊就地殲除不可稍有遷延
致餘匪復行滋擾再另片稱前次拏獲首逆胡明
遠一犯訊非胡逆正身乃係胡明遠營內管事先
鋒黃秉祿詰其因何冒認該犯供稱認作胡明遠
庶兵役不致到處緝拏俾胡明遠得以潛身遠遁
等語該犯旣肯充認胡明遠正身必係該首逆親
密之人其黨惡狡詐甚爲可惡現旣嚴審明確如

業經正法則已若尙在候旨著卽將黃秉祿凌遲處死仍遴派妥幹人員密拏胡明遠務獲爲要又安插鄉勇一節該督欲於大兵未撤以前酌量籌遣並知照各原籍地方官妥爲管束免致結隊擾民所辦已得其要總之鄉勇一項既經裁撤宜散而不宜聚朕聞陝省鄉勇尙有在棧內搶掠者此等半係失業遊民若不爲伊等謀一衣食之資難

保其盡能安分守法吳熊光當察看情形如該勇
有不願入營充伍者或設法令其充當民壯俾得
有錢糧可資養贍並嚴切曉諭令各守分謀生遇
有在外滋事之人仍當隨時按律懲辦庶該勇等
知感知畏自臻寧帖所有此次陣亡把總羅萬泰
外委趙光前俱著咨部賜卹

欽定剿平三省邪匪方略續編卷四

癸亥年

二月初一日

丁酉

上命軍機大臣傳諭馬慧裕曰現在陝省辦理善後事宜需用較多著馬慧裕於豫省存貯備撥項下撥銀五十萬兩解往陝省交祖之望收貯備用

初六日

壬寅

額勒登保奏言現在德楞泰回川境

督剿

臣

以陝界毗連通南地方穆克登布所剿

宋陳等逆賊匪現已分散零星亟須分兵搜捕
遂札飭穆克登布將所帶官兵分爲數路北與
陝境防兵互相犄角南與川境武隆阿達自祥
達斯呼爾岱羅聲臯剿兵聯絡聲勢均自西向
東無論山谷深林逐細排搜務使兵過賊盡不
得稍留遺孽茲據楊遇春報稱副都統銜噶拉
等搜至南江石龍溝有零匪十餘人藏匿老林

當經殲斃四名生擒張子澄等九名其由江北
竄來客匪經防堵遊擊胡定泰帶領官兵由高
橋截擊殲斃賊匪十餘名富登阿王兆夢追兵
亦到遂會合趕剿殲賊二十餘名生擒八名餘
匪由界嶺竄入川境太平之平壩城口一帶楊
遇春現帶兵至毛壩關進逼川界一而跟蹤趕
剿一面飭令富登阿王兆夢祝廷彪等由大竹

河抄截並劄知格布舍由城口自東向西迎剿
夾擊又副將多隆武稟報派兵於箭桿山巴山
內一帶老林搜獲零匪張應元等五名又武隆
阿稟報派叅將馮元帶兵搜至南江老林搜出
賊匪數人當經擒獲五名滾崖跌斃四名又於
魚尖壩林內搜獲零匪三人又據賽冲阿報稱
田朝貴所剿之賊竄至滾界賽冲阿帶兵趕剿

追至廟埡子林內殺賊十餘名生擒八名守備
蘭魁武猝被矛傷陣亡餘匪仍折入川境現經
田朝貴躡蹤追剿此時陝境西至南鄭寧羌東
至安康平利與二竹界連一帶賊匪均已廓清
該匪既經零星合竄川境德楞泰現於太平八
臺山一帶顧西督剿勒保於梁墊開縣等處腹
地督辦東面有提督豐紳總兵馬瑜等官兵足

資扼截

臣

現又派兩路官兵入川向南跟剿正

可於太平大寧一隅會合殲洗至南山西面零
匪祇百餘人有楊芳張廷楷吳廷剛李應元分
帶官兵趕剿日內當可得手

同日勒保奏言查雲陽境內尚有王國賢曾芝

秀餘孽一二百人零星四竄

臣

嚴催迅速剿辦

茲據色爾滾馬瑜等稟報前在金風嶺一帶掃

除令匪後移師雲陽所屬之馬鹿坡適探有零
匪數十人在彼竄走當卽督兵追捕鄉勇劉智
貴聶貴擒得賊首劉泳堯秦可番餘匪四竄經
官兵殲斃二十七名生擒三十二名又探得黃
柏溝大陽河地方有零匪一起復督兵往捕經
藍翎兵丁馬在新鄉勇黃清張玉相仕貴等將
騎馬賊首三人擒住當加查訊一係龔文華卽

線字號已殲首逆龔文王之弟一係線字號總兵余泳福一係黃號總兵蔣廷棟餘匪四散奔逃復經官兵追捕殺斃二十三名生擒二十八名又探得楊柳池地方有零匪三四十人復督兵往捕殲斃十三名生擒十八名又據叅將桂涵稟報在梁山所屬饋子山探有零匪四五十人帶兵往捕殺斃十一名生擒三十六名訊係

白號張簡股內剿散之賊又在梁山所屬潘家
硎探有零匪二十餘人帶兵往捕殺斃六名生
擒二十一名訊係青號剿散之賊又據叅將羅
思舉稟報在忠州所屬老龍硎探有零匪二三
十人帶兵往捕殲斃數名生擒二十名所有各
路生擒之犯俱訊明分別辦理臣近日偵探忠
梁一帶漸次肅清雲陽境內色爾滾馬瑜等剿

散之賊本不過一二百人近又疊次殲擒百餘人并將劉泳堯秦可番龔文華等生擒計所剩餘孽亦屬無幾惟開縣奉節太平等處老山內尙未排搜淨盡而前由陝省南山竄入太平城口老林之賊尙有一百餘人現經田朝貴帶兵搜捕又大寧邊界復報有零賊三百餘人由楚省房縣陰條嶺竄出有奔入大寧之勢臣現已

寄信豐紳張績等此等零匪無論在楚在川總
須剿辦淨盡轉不必過爲擱截即使竄入川境
現在兵力儘敷剿辦只須上緊殲淨早冀肅清

臣卽日由長壽取道忠萬雲奉一帶督催辦理

至臣通計川省情形腹地州縣卽可次第肅清

川北一帶亦無賊匪竄入惟所報大寧房縣交
界竄走之賊據稱有三百餘人卽使竄入川境

亦爲數無多臣現在移師夔州府一帶並查探

楚境零匪情形如果各地方節次肅清自應將

官兵次第凱撤臣擬於二月內將東三省官兵

先遣起程雲南官兵次之貴州官兵又次之其

四川本省官兵暫留川東川北各處巡防搜捕

俟全境肅清後再行分撤回營

同日惠齡奏言臣據楊芳稟報該鎮由大茨溝

蓮花石等處漏夜追賊趕至大水溝腦直前撲
殺戮斃賊匪五人轟斃賊匪十餘人該匪不敢
抵敵遂由銀杏壩西奔又折向七星壩南趨江
岸楊芳帶兵於三更後趕至該匪正躡淺過江
楊芳率領先到兵勇數十名直前掩殺淹斃賊
匪二十餘名生擒譚仲榮等五名餘賊搶登南
岸向白沔峽一帶狂奔等情

臣

查此股賊匪雖

已過江而西路李應貴所剿之賊尙在烏木梁
老林楊芳係寧陝鎮總兵南山是其本汛自未
便令其遠追當派叅將張超帶兵過江追躡現
聞經畧亦經派兵截擊一入調派提督楊遇春取
道西鄉趕來督剿南岸地勢稍寬卽日可期撲
滅臣卽帶同楊芳趕赴西路協同李應貴剿辦
途次接據本應貴稟報西路零匪自綢上烏木

梁後竄入太白河該鎮率兵追趕殺斃四十餘
名生擒楊廷佐等十一名該匪有折奔黃柏園
厚畛子之勢李應貴現帶兵折回抄截等情

臣

飭令楊芳等趕赴黃柏園顧東舉剿

臣

率領都

司祁祥馳抵楊家灘伏兵以待次日該匪竄至
斃斃賊匪十餘人餘匪鑽入北面老林又斃斃
十餘人兼用大礮轟斃賊匪數人餘賊由老林

內零星四散

臣

現復鼓勵兵勇以此股零匪僅

剩一百餘人既經散竄其勢已蹙務於旬日之

間悉數搜除該兵勇等人人踴躍自告奮勇者

二千三百餘人情願深入老林分投搜捕現卽

分兵窮搜諒可速盡根株不致久延殘喘均奏

入

上命軍機大臣傳諭額勒登保德楞泰曰陝境業將

肅清惟川省餘賊尙在輾轉奔竄本日據勒保奏
種由陝竄至太平零匪一百餘人其大寧邊界零
匪計三百餘人自係由楚竄入川境之賊勒保現
移師夔府一帶督剿大兵雲集想殘敗餘匪無難
就地殲除額勒登保應飭催各路將領併力會辦
其抗拒官兵者自當痛加剿戮如有畏罪投出者
仍應量爲收撫務於前二月內一律廓清俟三省

善後搜捕事宜辦理完竣額勒登保德楞泰與勒保三人聯銜用六百里馳報德楞泰並將自軍營起程日期附報奏聞朕卽據以宣示中外但必須川陝楚三省邊界零匪實係掃除淨盡方可馳遞此摺總之大局業經勘定其搜捕一節固當迅速亦勿稍存草率至南山西面零匪本日據惠齡奏尙有百餘人應移咨該督并轉飭楊芳等上緊辦

竣毋任遲緩所有此次殺賊猝被矛傷陣亡之守
備蘭魁武著咨部賜卹

上又命軍機大臣傳諭勒保曰剿辦餘匪在川較易
於楚此時通計川省腹地及川北一帶已無賊匪
卽大寧交界竄入楚匪三百餘人或前日吳熊光
所奏分竄東湖之賊被剿緊急一併折竄入川亦
未可定勒保以該匪闖入川境不必過爲攔截祇

須就現有兵力足敷辦理等語所見甚是但爲數
總屬無多不難就地殲除勒保移師夔府一帶飭
催各路務當上緊排搜永臻寧謐所有此次擒獲
賊首龔文華等之藍翎兵丁馬在新著加恩以把
總拔補鄉勇黃清張玉相任貴著勒保查明賞給
七八品頂戴如三人已有頂帶卽加賞藍翎以示
鼓勵

上又命軍機大臣傳諭惠齡曰此次奔竄零匪節經
總兵楊芳李應貴等分投搜捕俱有斬獲惠齡亦
親率都司祁祥馳抵楊家灘一帶跟蹤追擊先後
共殲擒賊匪八九十人尙屬奮勉陝省南山餘匪
所剩不過一百餘人勢極窮蹙而官兵自告奮勉
情願入林搜捕者現有一千三百餘人已十倍於
賊自不難剋日搜洗淨盡且此等零匪均係各股

賊夥內積年戰手怙惡不悛斷不肯悔罪投出惟
應分兵圍剿以期盡絕根株不留餘孽爲要

初十日 丙午 吳熊光奏言竊 臣 據辦理興山寨勇

委員張霖稟報探知南陽河西寨有殘匪一起
向西疾竄該委員督同寨勇追捕趕至段樹堽
殲賊三名擒獲董大潮等六名此起係青黃兩
號殘匪湊合並無頭人又據都司麻光裕稟報

探有零匪百餘人從巴東火峯塘折奔歸州屬
之香溪一帶旋據副將孫應奉稟稱該協帶兵
馳至杜家川迎遇零匪三十餘人斃賊三名餘
匪紛紛四散當卽知會吉林泰李天林等分投
截捕臣伏查旬日來據報零匪情形雖人數無
多而蹤跡益形散漫故未能一鼓殲擒臣嚴飭
吉林泰李天林等務當窮其所向趕緊跟剿不

可再行兜擊旁抄使賊匪轉得趨避

臣

又查與

巴二屬緊接川境現聞勒保帶兵至川東一帶

督捕竊恐該處餘孽或又東竄楚界因思房縣

二竹邊界實已並無遺孽當飭呢瑪善帶領原

兵由興山排搜而南速清東境並可爲南路聲

援至房縣邊備亦未可空虛復派副將蔣觀濤

擇要巡防現在提臣慶成亦將次來抵房縣

臣

俟慶成到後將搜捕一切事宜與之妥速籌辦
總期盡剷根株廓清完善奏入

上命軍機大臣傳諭吳熊光曰此次西竄段樹埡及
折奔歸州一帶殘匪百餘人該委員將弁等沿途
趕剿殲擒共祇十數人皆不過零星落後之賊未
能跟蹤剿淨大有廢弛疎懈光景慶成現已到楚
該提督久歷戎行於該處情形熟悉所有楚省境

內零匪著卽專文慶成督率將弁趕緊排搜務於
前二月內一律淨盡俟楚省實在肅清卽行專摺
具奏

十二日戊申德楞泰奏言竊臣督兵回至川境與

富僧德等會合束行據副都統色爾滾總兵馬
瑜稟報前在雲陽屬黃柏溝剿剩零匪數十人
四散分逃復分派兵勇在大陽河等處搜獲三

名殺斃四名又趕至高枝廟等處殺斃十餘名
生擒十八名此起零匪剿除殆盡又據副都統
達勒精阿武隆阿稟稱在通江屬之魚尖壩搜
獲逃散零匪五名又據遊擊陳弼報稱探得雲
陽之沙沱子一帶有零匪百餘人當卽帶兵剿
捕生擒王囑賢之胞姪僞先鋒王朝富僞先鋒
陳道隆李思才等三名夥匪龍先桃趙張氏等

男婦三十名口殺斃僞先鋒侯覺元一名及賊
匪二十三名其陝省南山竄過南岸二百餘人
接額勒登保來信連日被各路官兵截剿已由
亮埡子翻山入川現在督率各路官兵搜剿扼
截查朱應伏一股賊匪百餘人竄往南江廣元
一帶亦有提督穆克登布副都統武隆阿副都
統銜達斯呼爾岱總兵達自祥副將羅聲皋

司劉清等各路兵勇搜捕卽日亦可掃除惟現
據哨探田朝貴所追之賊湊合山內各零匪三
百餘人又有苟朝九一股餘匪一百餘人竄至
大寧之紅池壩核桃壩一帶有出賣塔之勢

臣

聞報卽飛行知會提督豐紳總兵張績協力截
剿并札飭色爾滾馬瑜卽由開縣取道雲陽奉
節前往截其東竄之路與豐紳等兩面夾擊

臣

亦卽由官渡灣白沙河前赴開縣雲陽督同趕

辦此外又探得開縣山內濛濛溪一帶有零匪

百餘人於出山後向東鄉之南壩場南逃

臣已

飛調遊擊羅思舉帶領兵勇迎頭截剿計日可

以剪除奏入

上命軍機大臣傳諭德楞泰曰德楞泰奏太平山內
零匪被剿東奔並陝境餘匪竄入川界合計不下

千名似較前次奏報之數稍有增多其田朝貴二
路搜捕之賊前據勒保奏到係由陝省南山竄入
太平城口老林共祇一百餘人今德楞泰摺內稱
田朝貴所追之賊湊合山內各零匪三百餘人又
有苟朝九一股餘匪一百餘人會合是此起餘匪
共有四百餘人是否卽係與大寧邊界由楚竄入
之三百餘人湊合故有此數其開縣山內濛濛溪

一、帶零匪前次勒保等摺內均未提及，又係何股餘匪？是否卽係楚省竄賊？均未聲敘明晰。此時川省腹地業已肅清，所有各起零匪多在川省東境內。現在德楞泰前赴雲陽，開縣自西而東，勒保又已移師夔府，一帶自東而西，正可兩面夾擊。德楞泰惟當督飭鎮將等趕緊排搜，務於前二月內將川東餘匪一律剿除，淨盡，俾地方永臻寧謐。

十四日 庚戌

上命軍機大臣傳諭額勒登保德楞泰勒保曰前據勒保奏大寧邊界有餘匪三百餘人由楚省房縣竄至其太平城口老林內田朝貴所辦之賊止有一百餘人昨據德楞泰奏稱田朝貴所追之賊湊合山內各零匪有三百餘人而勒保前奏由房縣折竄大寧股匪德楞泰並未提及此三百餘人是

否卽係勒保所奏由楚竄至一起田朝貴剿辦賊
匪旣稱在山內委合恐竟係另起賊匪向在山內
潛藏此時又復出擾且德楞泰昨奏賊數統計有
千餘人較之前此額勒登保勒保所奏已覺增多
卽如開縣山內濛濛溪一帶零匪百餘人上次勒
保等摺內亦未提及此起賊匪又係何股餘孽何
處竄來伊等每次奏報搜捕餘匪俱有斬獲何以

賊數並未減少此卽賊數加增之驗數年以來每至冬間賊卽減少一屆春和旋又紛紛四出可見未淨餘匪總在深山竄匿雖天氣嚴寒之候賊匪豈能無所棲止忍飢度日此必有窩留之地方得藉以藏身額勒登保德楞泰勒保係統兵大員未必能親歷深山遍行搜緝卽派出將弁等亦未必窮涉險阻到處排搜或不過大概巡查輒以肅清

具報伊等亦不能深知卽據以入奏節年賊匪忽
少忽多藏事遲延未必不由於此卽如四年冬間
川省已報廓清額勒登保帶兵赴甘德楞泰亦移
師至陝而五年正月川境忽又有賊匪數萬由石
板沱搶渡嘉陵江以至賊匪鴟張魁倫卽由此獲
罪從前入山屯匿之賊川省居多此時陝楚邊界
零匪俱思逃竄入川恐川省山內潛匿未出之賊

尙不止此數甚至有大頭目在內勾合均未可定
此起賊匪旣已出山自不難痛加搜剿就地殲除
而川境深山老林諒非一處額勒登保等務當嚴
飭鎮將親身入山窮探賊蹤或於擒獲賊匪中嚴
加審訊有無窩留處所務趁大兵未撤之時迅速
剷除不可稍涉大意額勒登保等剿賊辛苦多年
至昨冬始得戡定大局中外咸知設辦理稍有草

率以致遺灰復燃卽伊等來京瞻覲後仍須帶兵
前往剿辦不獨伊等前功盡棄實屬不成事體朕
於大功告成後未嘗不盼帶兵大員將搜捕善後
事宜速行完竣來京展覲但必須辦理妥善以期
一勞永逸轉不可有心以速匆促撤兵致留餘孽
總須於迅速之中力求完善方爲不負委任

十五日

辛亥

勒保奏言

臣

由涪州鄧都忠州萬

縣雲陽一路取道行抵夔府途次據副都統色爾滾總兵馬瑜報稱近日在奉節雲陽開縣等處分兵搜剿探得馬家壩地方有零匪五十餘人卽分兵往剿殺斃賊匪十一名生擒二十八名內有偽總兵王三魁一名係白號逆首王三槐之堂弟又據都司周士貴稟報連日在梁山萬縣一帶搜捕探得翠峯山地方有零匪二三

十人當卽連夜往捕殺斃賊匪四名內有李姓
僞先鋒又生擒賊六名內有樊人傑之弟樊人
貴及旗手劉自明又據叅將陳弼稟報連日在
雲開等處山內搜捕探得沙沱子馬家溝一帶
有零匪一起帶兵往捕殺斃二十三名生擒三
十三名查係黃藍白等號剿散之賊並無賊首
在內又據叅將思舉稟稱在梁山所屬孫家

酒柏林漕等處搜獲零匪十一名至川北通江
南江巴州等處節據副將羅聲皋叅將唐際盛
等稟報該境並無成起賊匪惟搜探老山內或
一二十人或三五為羣零星藏匿該將等現在
分投搜捕又據奉節縣徐大椿面稟近日有剿
散零匪李緒貴等十四名先後赴縣投首皆係
川東川北脅從日久之人經該縣宣布

恩旨免其治罪遞回原籍交保安插

臣

查川省腹地

各州縣疊經分兵剿捕零匪漸就肅清

臣

連日

由長壽涪州酆都忠州萬縣一路沿途查詢俱

稱並無賊匪至川陝楚三省交界一帶邊境節

據探報尙有零匪四起內苟朝九一起一二百

人經田朝貴截回陝境又經賽冲阿截剿仍行

折竄入川適經畧額勒登保派格布舍搜剿沿

邊老林此起竄匪正與格布舍師行相近又有
臬司劉清所派通判劉星渠帶領鄉勇前來會
辦諒不日可以掃除又一起二百餘人係色爾
滾馬瑜等剿散曾芝秀王國賢股內之賊由八
臺山奔竄後坪一帶田朝貴現在緊躡追剿又
一起不知姓名二三百人前由湖北房縣陰條
嶺竄來經豐紳張績等兩路迎擊斬獲探信賊

匪一二十名知川省大巫邊境均有官兵未敢
深入卽折回楚境在巴東房縣地界老林藏匿
又據探報陝省南山內續竄出零匪二百餘人
已過漢南有由界嶺入川之勢

臣

查此四起賊

匪內苟朝九及曾芝秀王國賢二起賊匪統計
四百餘人現在川境有格布舍田朝貴兩路官
兵又劉清所派鄉勇分投剿辦其湖北不知姓

名賊匪一起尙在房縣巴東一帶並未入川已
囑豐紳張績在邊界防剿其陝省南山竄出後
起賊匪亦尙未深入川境恐被官兵追剿情急
逼竄入川現派色爾滾馬瑜等帶兵由寶塔取
道迎探截剿并順探格布舍田朝貴等所追之
賊如被兵逼剿東來亦可迎頭夾擊

臣現在夔

府將各路官兵分撥後卽移師西向聞德楞泰

已由大平回川臣與之彼此知會面籌督辦務

將該逆等設法掃除至川省此時搜捕零匪就

現在漢兵儘數辦理所有副都統侍衛章京及

東三省馬隊官兵無須久留臣現與額勒登保

德楞泰信商擬於日內先行凱撤以示體卹奏

入

上命軍機大臣傳諭德楞泰勒保吳熊光慶成日前

據勒保奏大寧邊界有零匪三百餘人由楚省房縣竄至其田朝貴所追太平城口老林內賊匪止有一百餘人昨據德楞泰奏稱田朝貴所追之賊寨合山內各零匪三百餘人又有苟朝九一起餘匪一百餘人會合此起賊匪共有四百餘人是否卽係與大寧邊界由楚竄至之三百餘人奏合抑該處山內另有潛藏餘匪竄出昨已降旨諭令額

勒登保德楞泰勒保查明具奏矣本日據勒保奏
川省腹地如奉節雲陽開萬忠梁各州縣節次經
官兵搜捕多有斬獲零匪以次肅清其川楚邊境
田朝貴所追之苟朝九一起仍不過一二百人由
太平城口向後坪黃墩一帶奔逃又曾芝秀王國
賢餘匪二百餘人竄入八臺山經官兵轟擊亦思
奔竄後坪田朝貴現在緊躡追剿至前由湖北房

縣竄來之不知姓名賊匪二三百人經豐紳張續等兩路迎擊該匪探知大寧巫山邊界均有官兵未敢深入卽折回楚境現在巴東房縣老林潛匿等語是昨日德楞額所奏田朝貴所追之賊湊合各零匪三百餘人似非山內另起竄出之賊或卽係大寧邊界仍折回楚省之三百餘人一起均未可定現在勒保駐紮夔府如大寧邊界果添出另

起賊匪地方官豈不稟報總督是勒保所奏尙屬
可信該處既有此數起零匪無論自何處竄至總
當督飭將領上緊搜除此時德楞泰由太平自西
而東勒保自東而西正可會合務將該匪等迅速
殄平先行肅清川境至大寧邊界賊匪三百餘人
仍折竄入楚亦當不分畛域卽派鎮將隨賊所向
緊躡窮追昨冬大功業經告竣所有三省未淨餘

匪務須一律殄除德楞泰係成都將軍勒保係四川總督凡地方搜捕善後事宜尤其專責非經畧額勒登保可比川省零匪一日不淨伊等一日不能卸責卽楚省餘匪一日不淨亦難保其不仍竄入川德楞泰將川境餘孽悉數蕩平彼時楚匪如尙未淨盡卽當移師幫同慶成等協力搜捕以期三省全行竣事至川陝楚三省零匪統計約有千

人伊等節次奏報各路搜捕餘匪俱有斬獲而賊數總未見少可見前奏未盡確實嗣後每次奏到軍務情形均須細核賊數除殲擒若干名外實在尙剩若干免致牽混如境內深山老林藏匿之賊復行竄出不妨於摺內據實聲明不必稍存諱飾卽如現獲王三槐之弟王三魁樊人傑之弟樊人貴該二犯久未露名今忽又竄出恐似此者尙復

不少此等賊目有一二未經殄淨其零夥必仍思
潛往竄合總當悉數殲除勿留餘孽倘其中有自
知悔罪棄械投誠卽果係頭目亦不妨予以生全
寬其一死俾賊衆聞知相率來投更易蕝事至勒
保所稱軍營副都統侍衛章京及三省馬隊官兵
現與經畧等札商擬卽先行凱撤一節該副都統
等如此時業已起程回京則已倘察看現在情形

尚須幫同剿辦卽酌量暫留數人亦無不可至楚
省邊界前據吳熊光奏賊蹤將次淨盡現在竄入
大寧巫山邊界零匪三百餘人又經川省官兵截
擊回楚遁入巴東老林德楞泰將川境餘匪辦竣
自應督率兵勇馳赴楚北跟蹤追剿吳熊光係該
省總督搜剿尤其專責慶成久歷戎行於該處情
形熟悉昨已諭令將楚省境內零匪專交慶成辦

理此時大功已成吳熊光慶成務應飭催總兵慶
溥吉林泰李天林德昌等併力一心於德楞泰未
到之先上緊剿洗淨盡不可因德楞泰卽日督兵
前來稍存觀望並不得僅以山內潛匿之賊遁出
楚疆卽爲了事總須就地殲除俾楚省邊界實在
肅清方爲不負委任再前此吳熊光奏分竄東湖
之賊現在曾否辦竣亦著一併查奏

同日

上諭內閣曰川東川北州縣連年被賊滋擾節經降旨分別蠲免前因大功戡定復經諭令該督等查明所屬州縣帶徵緩徵民欠民借一切銀米自嘉慶元年至七年爲止分別開單進呈候朕加恩茲屆嘉慶八年開徵之期小民等於本年應徵地丁錢糧自應踴躍輸將惟念該地方甫經寧謐生計

尙艱若照例徵收民力究恐拮据所有從前被賊
情形較重之太平大寧廣元通江南江五廳照應
徵嘉慶八年地丁正耗錢糧著加恩蠲免十分之
五其情形較輕之巴州蒼溪奉節巫山四州縣應
徵本年地丁正耗錢糧著加恩蠲免十分之三雲
陽萬縣開縣江北長壽達縣東鄉新寧忠州酆都
墊江梁山太竹鄰水閬中昭化十六廳州縣應徵

本年地丁正耗錢糧著加恩緩至秋後開徵又太平大寧廣元通江南江五廳縣應徵鹽茶課稅銀兩並著一體展限俾同閭漸臻樂利益慶盈寧以副朕覃敷惠愷至意

十六日 壬子 惠齡奏言竊 臣 督飭各路兵勇入林

窮搜千總張文魁一路在大澗溝腦搜捕有零匪二十餘人潛蹤埋伏兵勇瞥見一齊攻撲立

斃賊匪十五人餘賊七八人滾崖落澗登時斃
命此起零匪均經辦竣又軍功伍敏在小嵐溝
搜遇零匪二十餘人立時斃斃賊匪三人餘賊
奔竄中心梁老林該軍功等趕至中心梁立斃
賊匪十餘人生擒賊目胡元魁並戰手謝清等
八名此起零匪亦無一名漏網訊據胡元魁供
係張家營總兵只求殺死不願投降當將該逆

斃割其餘亦概予殛誅又把總蒲子琴在燕嶺
子搜遇零匪三四十人恃險抗拒官兵高喊投
降免死該匪等置若罔聞兵勇人人憤恨悉力
仰攻立斃賊匪十餘人生擒五名官兵仍翻嶺
追殺忽有軍功張得勝等追來一股零匪數十
人與該匪奏合折回抗拒兩路兵勇一齊撲殺
立斃賊匪二十餘人該匪乘夜向爛泥灘奔逃

又總兵李應貴派出守備張必祿等在太平臘
搜遇賊匪數十人自密箐內突出戳傷兵丁二
名張必祿帶兵迎擊立斃賊匪四人餘賊遁往
太白河走馬嶺一帶該守備等仍跟蹤前進又
辦寨委員徐聯科先後搜殺賊匪五人委員雒
昂招降零匪呂瓊開等三名雙龍寨鄉勇搜獲
零匪一名該匪等零星湊合數十爲羣此次兵

勇分投入林搜捕均有斬獲並已辦竣兩起寨
堡各勇亦均能隨處搜拏諒此窮蹙餘孽不能
日久潛匿現在楊芳由厚畛子抄截李應貴由
黃柏園尋蹤前進副將張廷楷吳廷剛等由都
督河兗逼臣亦由紅水河扼剿各路官兵均自

太白山東北兩面向西南櫛比排搜以期盡絕

根株掃清山境再臣前恐東路尙有零匪潛匿

未淨曾經派令遊擊林向榮等分兵搜捕茲據
稟報該遊擊在大南河搜殺賊匪數名又外委
楊起隆在甘岔河盤獲賊匪一名兵丁盧貴在
吊樓溝搜獲賊匪一名臣批飭該遊擊等仍當
逐投窮搜毋使一名漏網奏入

上命軍機大臣傳諭惠齡日前次惠齡奏稱南山餘
匪剝剩不過一百餘人今各路兵勇將大澗溝腦

並中心梁等處竄匪四十餘人概行殲斃核之前
報賊數所剩已屬無幾而摺內核計陝省賊匪較
前轉復加增可見該督前此查報未盡確實在
山內零匪勢極窮蹙卽或有潛匿老林復行逸出
者亦當逐細搜查一律剿盡切勿稍涉諱飾再摺
內訊據獲賊供稱有只求殺死不願投降之語又
官兵臨陣高喊投降免死該匪等竟置若罔聞此

等匪徒怙惡不悛無所用其姑息自應痛加搜剿
以絕根株倘其中有自悔罪棄械投誠者則不
妨量予收撫也